

## Transkription von Urkunde PAR 1385a

Ort, Datierung: Parchim, 1385-04-25

Signatur: Landeshauptarchiv Schwerin, städtisch, ACS 68

Inhalt: Verkaufsurkunde

In godes name(n) amen . Nod is der dingh De ze scheen vn(de) Jeghene(n) i(n) der tyd myt beradene müde vn(de) godeme wille(n) . Dat me de stedegehe vn(de) vesteghe / myt breue(n) edder myt tûghe(n) lefdeghe lude . We(n)te des my(n)schen dachtnisse kranc vn(de) vorghekelk is . Hir v(m)me is Dat wy Ratma(n)ne der stad tû / parche(m)<sup>1</sup> . De nû Jeghe(n)werdich synt vn(de) de noch tû kome(n) moghe(n) . beke(n)ne(n) vn(de) betûghe(n) openbar Jn desseme br[e]ue vor alle(n) criste(n) lude(n) De desse(n) bref zeen / edder hore(n) lezen . Dat wy myt gantzer endracht vn(de) wilbort vn(de) na rade vnser wiseste(n) . hebbe(n) vorkoft vn(de) Jeghe(n)w(er)delke(n) vorkope(n) tû eneme ewighen / kofte(n) kope reddelke(n) vn(de) rechtlike(n) ? . Deme wise(n) beschedene(n) ma(n)ne Gherd kosse va(n) plawe<sup>2</sup> borgher tû parche(m) vn(de) syne(n) r(e)chte(n) erue(n) . Drutteynde halue / mark Jngheldes lub(escher) pe(n)ni(n)ghe Jn deme dorpe tû giscowe<sup>3</sup> Dat dar licht i(n)der voghedie tû parchem . alle iar vp tûbore(n)de tû su(n)te mycheles daghe / va(n) den houe(n) vn(de) vte de(n) houe(n) Dar nû vppe wone(n) Dese nascreuene lude alze hinseke wantsnyder Dese gift sostehalue mark lub(esch) . Clawes grelle / vif mark lub(esch) . herme(n) weuer ene mark lub(esch) vn(de) hinseke grelle ene mark lub(esch) . edder va(n) ere(n) nakomeli(n)ghe(n) . de de houe(n) bûwe(n) edd(er) de houe besitte(n) / vor anderhalf hu(n)dert mark vn(de) vifvn(de)twintich mark lub(escher) pe(n)ni(n)ghe .<sup>4</sup> De vns tû noghe vn(de) tû danke wol beret syn . myt aller vryheit vn(de) nutte=/gheyt . i(n) holte i(n) velde i(n) water i(n) weyde i(n) ackere ghebuwet vn(de) vnghebuet i(n) weghe(n) vn(de) i(n) vnweghe(n) i(n) brûke(n) i(n) visscherie . myt denste richte vnde / broke tû ma(n)rechte . vryg(e) vn(de) ewich tû hebbe(n)de vn(de) tû besitte(n)de su(n)der hinder vn(de) weddersprake vnser vn(de) vnser nakomeli(n)ghe . Dyt zulue gûd / mach gherd koz vorbenomet myt syne(n) fru(n)den pande(n) . wa(n)ne vn(de) wo dicke em des nod is . vn(de) de pande vore(n) Dryue(n) edd(er) bringhe(n) i(n) de stad tû p(ar)che(m) / vn(de) vor syne jarlikes pleghe vt tû sette(n)nde s(n)der richte edd(er) broke . Ok scole wy vn(de) wille(n) dyt vorscreuene gûd vorheghe(n) vordeghedinghe(n) alze / vnseme ande(re)n gûde wor wy dat hebbe(n) . vn(de) endfrige(n) va(n) aller ansprake . Ok mach gherd koz vn(de) syne erue(n) dyt vorbenomede gûd vn(de) Jnghelt / vorkope(n) vorbute(n) vorgheue(n) edder legghe(n) tû ewighe(n) vicarie(n) . edd(er) tû ande(re)n milde(n) almissee(n) ghestlik edd(er) werlik . wor em dat alder enest ku(m)pt / Vnde wille(n) ok desse lude vorscreue(n) edd(er) ere nakomeli(n)ghe De desse houe(n) buwe(n) edd(er) de houe besitte(n) nerghe(n) mede besware(n) myt nyger bede . / bescattinghe edd(er) vmplacht edd(er) Jn(n)ma(n)t va(n) vnser weghene . vnde gheue(n) ouer aldes Dat desseme breue tû scade(n) kome(n) mach . neghe(n) mede / tû brekende edd(er) tû hindernde . men wy vn(de) vnse nakomeli(n)ghe scole(n) vn(de) wille(n) dat also holde(n) i(n) allermate alze desse bref , vtwiset . alle desse / vorscreuene dingh loue wy Ratma(n)ne der stad tû parche(m) myt vnse(n) nakomeli(n)ghe(n) . Deme vorbenomede(n) . gherd kosse va(n) plawe borgher tû / parche(m) vn(de) syne(n) r(e)chte(n) erue(n) . vn(de) weme he dat gift edder vorlet by wolmacht edd(er) i(n) krancheyt synes leue(n)des stede vn(de) vast tû holde(n)de su(n)der alle / arghelist , vn(de) hulperede Vnde hebbe(n) des tû tûghe vn(de) tû bekantnisse vnser stad Jnghezeghel myt vnser aller witscop vn(de) godeme wille(n) laten / henghe(n) vor desse(n) bref . De gheue(n) vn(de) screue(n) is

tũ parche(m) na godes bort Dusent iar Drehu(n)dert iar Jn deme vif vn(de) achtigheste(n) iare . Jn  
su(n)te / marcus daghe des hilghe(n) ewangeliste(n) . Hir ouer sint ghewzet Erlike wise lude . alze her  
hinric va(n) plawe kerche(re) tũ su(n)te Jũrie(n) tũ parche(m) / her gherd giscowe kerche(re) tũ vnser  
vrõwe(n) dar zulues . her meynard va(n) dene haghene p(re)stere . He(n)neke vn(de) deneke brũde(re)  
ghe hete(n) weltzine / knechte . vn(de) mer gũder lude de loue(n) wol werdich syn /

---

<sup>1</sup> Dat wy Ratma(n)ne der stad tũ / parche(m) im Original unterstrichen

<sup>2</sup> Gherd kosse va(n) plawe im Original unterstrichen

<sup>3</sup> erue(n) . Drutteýnde bis tũ giscowe im Original unterstrichen

<sup>4</sup> vor anderhalf bis lub(escher) pe(n)ni(n)ghe im Original unterstrichen